

CONFERENCE DES EVEQUES CATHOLIQUES DU BURUNDI

Secrétariat Général

INYIGISHO ISHIKIRIJWE N'INAMA Y'ABEPISKOPI GATOLIKA B'I BURUNDI KU MUSI W'IMANA WA MBERE W'IGIHE C'UBUSHIKIRO MU 2022

Nituzigame ukwemera kwacu kandi tuguhagararire kuko gusumvywa igiciro inzahabu (1 Petero 1, 7)

Bavukanyi dusangiye ukwemera, eka na mwe mwese Imana ikunda mukayikundira,

1. Twebwe Abungere banyu b'Ekleziya gatolika, tubanje kubaramutsa amahoro ya Kristu yaje ari "Umwami w'amahoro", ngo atumenyeshe Imana y'ukuri, yongere atunywanishe na Yo kandi atwungire ubumwe¹.
2. Tubashikirije iyi nyigisho mu gihe dutanguye ubushikiro, ca kiringo kiroranye kiduha akaryo keza ko kwitegurira guhimbaza neza umusi mukuru wa Noheli. Uwo musi mukuru na wo murazi ko utwibutsa iteka twatewe n'uko Umwana w'Imana yigize umuntu akabana natwe, ngo uwumubonye abe abonye iyo Mana y'ukuri². Ni twame dukenguruka iryo teka Imana yaduteye, kuko yatumaze inambu na basokuru bacu bari bafise, y'ukumenya Imana, uguhura na Yo n'ukwibanira na Yo. Iyo Umwana w'Imana atigira umuntu, nitwari kurenga urugero ba sokuru bashoboye gushikako mu vy'Imana. Nkako, nk'uko inyigisho y'Inama nkuru ya Vatikano ya kabiri ibivuga, babigira nk'abazimagirika, nka kurya k'umuntu arondera ikintu mu mwijima³.
3. Yezu Kristu, Umwana w'Imana rero ni We yatumye tumenya neza Imana nka Serukundo, Umuremyi n'Umuvyeyi wa twese abantu, atuma tumenya n'uko iyo Mana yaturemanye agashusho kayo. Ni We cane cane yaturonkeye iteka ba sokuru bacu batashobora kwiyumvira, ry'uko "agapfuye katabazwa ivu" canke ngo uwupfuye ahinduke "umuzimu", ahubwo ko umuntu apfuye yemera Imana akayikundira, azukira kuba muzima mu buhirwe kandi adasubira gupfa. Aho ni naho ukwemera kwacu gushingiye nkuko Paulo mweranda avyigisha igihe agira ati: Kristu niyaba atazutse, ukwemera kwanyu ntikugira ishingiro⁴. Ntihakagire rero uwucambirwa gusubira mu vya kera ngo hari akunguko yoba aronse. Ahubwo, kwoba ari nk'ugusubira mu mwijima yaramaze kubona ahari umuco, kuko nk'uko Yohani mweranda avyigisha: Jambo yigize umuntu ni We ari «umuco w'ukuri, uboneshereza zina muntu wese»⁵.
4. Igihimbaye muri uku kwemera kwacu tugaragariza mu muryango w'Ekleziya gatolika, ni uko kwagenewe bese, kutiharijwe n'igihugu kanaka canke ubwoko bunaka. Yezu we nyene ubwiwe yaratomoye kuva mu ntango ko uku kwemera kugenewe bese. Ni vyo dusanga mw'itegeko yahaye abigishwa biwe, igihe yabikebanura agira ati: «kwire isi yose, mushikirize Inkuru nziza ikiremwa

¹ Raba Yohani 11, 52.

² Raba Yohani 14, 9.

³ Raba Inyigisho y'Inama nkuru ya kabiri yabereye i Vatikano: *Nostra aetate*, n.2.

⁴ Raba 1 Abanyakorenti 15, 17.

⁵ Yohani 1, 9.

